


ARRÉGULAS PO SU SARDU

#3

**Is cunsonantis
mudòngias e sa
derruta**

CUNSONANTIS MUDÒNGIAS

Repetita juvant narànt is latinus!
In sardu **fueddada e scriptura non torrant paris.**



Candu fueddaus bessint a campu medas **fenòmenus fonéticos** chi tocant stretzaus e cumpréndius beni po non sballiai scriendi.

CUNSONANTIS MUDÒNGIAS

Torraus a nai puru ca is **cunsonantis mudòngias** funt cussas chi **candu s'agatant a cumentzu de fueddu e ananti nci tenint una vocali** podint generai duus fenòmenus diferentis:

- sa lenitzioni cun:

C F P T

- sa derruta cun:

B D G + F

DERRUTA

Oi bieus sa derruta, su fenómenu chi fait **arrui sa cunsonanti mudòngia**.



“**sa** **b**idda” si ligit “**sa** idda”

vocali

cunsonanti

cunsonanti

mudòngia

arruta

In dónnia manera sa lìtera chi nd'arruit
tocat scrìta su pròpriu!!!

DERRUTA DE [B]

Bieus totus is casísticas de derruta

[b] est su sonu de: bingia, baca, bòi



sa bingia, sa baca, su bòi



sa ìngia, s'aca, su òi

DERRUTA DE [D]

[d] est su sonu de: didu, denti



su didu, sa denti



su idu, s' enti

DERRUTA DE [G]

[g] est su sonu de: gatu, gunnedda



su gatu, sa gunnedda




su atu, sa unnedda

DERRUTA DE [d̪ʒ]

In sa fueddada sarrabesa a bortas
nd'arruit sa g durci puru.

[d̪ʒ] est su sonu de: Giuanni, genna, geca



Santu Giuanni, sa genna, sa geca



Sant'Uanni, s'enna, s'eca

DERRUTA DE [F]

Custu fenómenu pertocat a is **fueddadas barbarixinas** e lacanantis. Est una derruta particulari chi acuntessit dónnia borta chi sa f s'agatat a cumentzu de fueddu sena de dipendi dae ita nci tengant ananti.



focu, foza, fizu, Fonne



ocu, oza, izu, Onne

UNU CUNSILLU

Medas bortas non si nd'acataus candu nd'arruit sa cunsonanti. Tandu si podit probbai a furriai su fueddu a su plurali. Cumentis eus nau sa derruta acuntessit sceti cun una **vocali** ananti (**su**, **sa**), tandu cun sa **cunsonanti** (**is**) ndi iat a depi bessiri a foras puru sa cunsonanti arruta.

*sa idda / is **biddas*** -> sa bidda

*su idu / is **didus*** -> su didu

*su atu / is **gatus*** -> su gatu